

Sut la Banca naziunala u a Fort Knox?

Ils deposits d'aur èn secrets

DA CLAUDIA CADRUVI / ANR

■ **Quantas tonnas aur svizzer vegnan magasinadas en l'exteriur? Il mardi proxim ha lieu ina sesida da cumissiun. Luzi Stamm (pps/AG) less cuntanscher che l'aur turna en Svizra.** Quatter cussegliers naziunals han ils ultims onns dumandà, nua che l'aur da la Banca Naziunala Svizra (BNS) sa chatta. Igl è stà *Paul Günter* (ps/BE), *Oskar Freysinger* (pps/VS), *Hans Kaufmann* (pps/ZH). Il 2007 ha Stamm dumandà pled e fatg. La resposta dal cussegl federal ha adina tunà circa tuttina. «Per motivs da diversificaziun magazinescha la BNS ina part da l'aur en l'exteriur. La gronda part vegn dentant salvada en Svizra», uschia il cussegl federal. «Sco autras bancas centralas na dat era la BNS ord motivs da segirtad betg enconuschent ils lieus da deposit da la facultad d'aur.» Sco lieus da deposit vegnian en dumonda be pajais cun ina buna stabilitad politica ed economica.

En la fortezza a Kentucky

In dals pli gronds magasins d'aur dal mund sa chatta a Fort Knox. Là depona la tesoreria dals Stadis Unids sias reservas d'aur. Era las reservas da la Banca federala da la Germania duain esser magasinadas en la fortezza d'atschal e beton a Kentucky.

Hai era barras d'aur svizas en ils tresors americans? «Jau hai discurrì cun *Jean-Pierre Roth*, il directur da la BNS, ed hai discurrì cun il cussegl federal», di Stamm. «Ma jau n'hai nagin'idea. Pli ditg ch'els taschan e pli fitg ch'jau hai suspect.»

Il mardi proxim discutta la cumissiun per economia e taxas l'interpellaaziun da Stamm. Tractadas vegnan era duas iniziativa parlamentaras da la pps. La partida vul cuntanscher ch'ins depona puspè tuttas reservas d'aur en Svizra e che la BNS na venda nagin aur pli. Anc meglier fissi, sche la Banca naziunala cumprass puspè dapli reservas, manegia Stamm.

Aur tegna pitg a tuttas crisas

Ils onns novanta aveva la BNS anc 2600 tonnas aur. Lura han ins decidì da vender la mesadad da l'aur per dar ina part dal retgav a la fundaziun da solidaritad. Questa fundaziun han ins creà perquai che la Svizra era vegnida sut squitsch pervi da contos da personas sparidas durant la Segunda guerra mundiala.

Suenter ch'ins ha vendì las 1300 tonnas aur per radund 20 milliardas francs ha la BNS anc ina giada decidì da vender 250 tonnas. Oz restan anc reservas da 1040 tonnas.

«Ins ha vendì l'aur per in pretsch miserabel», sa vilenta Stamm. Uss fiss il pretsch d'aur puspè sin l'ault. Ma il cusseglier naziunal da l'Argovia na less insumma betg vender reservas d'aur, n'emporta betg per tge pretsch. El deplora che anc oz che la BNS ha insumma vendì las 1300 tonnas. Las 20 milliardas ch'ins haja obtegnì na possian mai compensar la valita d'aur che tegnia pitg a mintga crisa economica.

La crisa fa midar idea

Stamm è spannegià, tge che resorta l'emna proxima da la discussiun en la cumissiun. Sia finamira, ma era quella da



La facultad d'aur dal pievel svizzer sa chatta en tresors svizzers ed en l'exteriur.

KEYSTONE

la pps, è clera: Las reservas d'aur duain turnar en Svizra. I na dastga betg pli vegnir vendì reservas. E sche pussaivel duai la BNS insacuras puspè comprar aur.

Avant dus onns avess ins probabel be ris davart talas propostas. «Ma pervi da la crisa da finanzas pensa la gliעד eventualmain in pau auter», di Stamm.

La BNS empresta aur

«L'aur vegn tegnì en salv en lieus segirs en Svizra ed en l'exteriur», di *Nicolas*

Haymoz, il pledader da la BNS. Dapli na mitscha betg sur sias levzas. El na tradescha era betg, sche la cumpart da l'aur en l'exteriur surpassa la mesadad da tuttas reservas. Il directori da la BNS possa decider davart la vendita da las reservas d'aur. Il directori consista da trais persunas: il president *Jean-Pierre Roth*, *Philipp Hildebrand* e *Thomas Jordan*.

E quantas persunas san, nua che las reservas d'aur èn magasinadas? Era questa dumonda na vul *Haymoz* betg re-

spunder. El sez na saja en mintga cas betg orientà.

Da las reservas d'aur haja la BNS dà 138 tonnas en emprest e retschaivia tschains persuenter. Talas fatschentas sa numnan «Gold-Lending». L'emna proxima cumparia il nov rapport da gestiun da la BNS, di *Haymoz*. Quel cuntregnia las cifras pli actualas pertutgant l'aur en emprest. Ma a tgi ch'ins ha emprestà l'aur na stat deplorablmain betg scrit en il rapport.